

# کتاب طبرستان

اون بش کونده بر نشر اولنور دینی ، علمی مجموعه اسلامی در

صاحب و مدیر مشرلی

ابو العلا زین العابدین

تاریخ تأسیسی

۱۳۳۰

عدد : ۱۲ ۸ رجب سنه ۱۳۳۱ پنجشنبه ۳۰ مایس ۱۳۲۹ برنجی جلد

[ رساله ده مندرج مقاله لرك و بتون یازیلرك حقوق ، ( حق تألیف قانونی ) موجبنجه محفوظدر . ]

[\*]

## تفسیر شریف انوارستان

۱۰۴ — يَا أَيُّهَا الَّذِينَ آمَنُوا لَا تَقُولُوا رَاعِنَا وَقُولُوا انظُرْنَا وَاسْمَعُوا وَلِلْكَافِرِينَ

عَذَابُ أَلِيمٌ .

ای ایمان ایدنلر « راعنا » دیمک ، « انظرنا » دیمک و دیکله یک [ بی محترم صلی الله علیه وسلم افندمنزه خطابلرنده صحابه کرامک لسانلرنده « راعنا » تعبیری دوران ایدر ایدی . بوندن مقصدلری : تقریر نبویگی ایجه ایشیده مدک ، حاملزه مراعاتله لطفاً تکرار بیور دیمک ایدی . « راع » مراعاتدن امردر و « نا » متکلم مع الفیر ضمیر ایدر ، معنای ترکیب : بزه مراعات ایت دیمکدر . لکن طائفة یهود مسامینک کمال ادبانه استعمال ایتدکاری بو ترکیبی تلفظ ایدرکن دیلارینی بوکدرک و حروفی مخارجندن قایدیره رق حاشا

[\*] بیان حال : حرب مناسبیله تأخیر نشریات ایتش اولان ( کله مایه ) صلحک تقررینه مبنی وظیفه نشریه سنه دوام ایدیور .

[ رعناء یا محمد ] دیمکه باشلادیار . [ رعناء ] ارعن کلمه سنک مؤثی در . [ ارعن ] نه سویدلیکنی بیلمز بون آدمه دینور . ایشته یهودک بوتدلیسنه مبنی مسلمانین اولتعبیرک استعمالندن نهی اولنوب لزوم کوردنکده بو تعبیرک برینه اومعنایه اولهرق [ انظرنا ] دیماری امر ایدلدی . یاخود مؤمنارک رسول اکرمه [ راعنا ] دیه خطا بلاری : سن بزه محتاج ومنتدار سین ، بزه حق رعایت ایله رعایت ایت معناسنه دلالت ایلدیکنندن بحث ایله یهود بو تعبیری مؤمنارک رسول اکرمه حرمت ایلدکلرینه سسند اتخاذا ایلدکلرندن ومؤمنارک مقصدی کرچه بو دکلمه ده تعبیر مذکورده ایهام سوء ادب بولندیفندن حسن افادهیه ارشاد ایچون بروجه مشروح نهی وامر صادر اولدی وطلب اعادهیه حاجت قلامق ایچون تقریر نبوی حسن استماع ایتملری ده آیرنجیه امر بیورلدی . خاتمه آیتده دخی شویله بیوریلور : [ کافرله عذاب الیم واردر ] یهودک بوتدلیس و تعریضاری آثار کفردن برکفر اولوب اوکافرلر ایچون عذاب المناک واردر ، ارقق سزده ایها المؤمنون نهی اولندیفکنز بو ایهاملی تعبیری استعمالدن تحاشی ایلک ] .



۱۰۵ — مَا يَوْذُو الَّذِينَ كَفَرُوا مِنْ أَهْلِ الْكِتَابِ وَلَا الْمُشْرِكِينَ أَنْ يُنَزَّلَ عَلَيْكُمْ

مِنْ خَيْرٍ مِنْ رَبِّكُمْ وَاللَّهُ يَخْتَصُّ بِرَحْمَتِهِ مَنْ يَشَاءُ وَاللَّهُ ذُو الْفَضْلِ الْعَظِيمِ .

اهل کتاب ایله مشرکیندن اولهرق کفر ایدنلر [ حسدلرندن ناشی ] سزه ربکزدن هیچ برخیر تنزیل اولندیفنی [ رلطف و خیر افعام و افاضه ایلدیکنی ] ایسته مزملر [ سزی سنن فطرت او زره تدویر ایدن وشعوب وقبائلکزی فقط توحیدده جمع ایلان قرآن کبی برهدایت عظمی و آیت کبرانک احسان بیورلسنی چکه مزملر ، حسدلرندن یورکلری طو نوشه رق حقکیزده کونا کون افعال واقوال لئیمهیه جرأت ایدرلر ، سز بونارک هیچ برینه مبالاة ایتمیک ] . جناب حق [ اقتضای حکمت علیهسه کوره ] رحمتی [ قوللرندن ] دیله دیکنه تخصیص ایلر . الله [ تعالی ] عظیم فضل [ وکرم ] صاحبی در . [ ذات الوهیتک فضل وکرمی بی پایاندر . حسادک سزک حقکیزده خیر تمی ایتماملری خزانه الطاف ربانیهدن دمبدم منتعم اولمکزی هیچ بروقت منع ایده من ] .

« من اهل الكتاب » قول شریفنده کی [ من ] اداتی بیسیانه در . « ولا المشرکین »  
مجرور اولسی قرینه سیله « اهل الكتاب » اوزرینه معطوفدر .



۱۰۶ — مَا نَسْخُ مِنْ آيَةٍ أَوْ نُنسِهَا نَأْتِ بِخَيْرٍ مِنْهَا أَوْ مِثْلَهَا أَلَمْ تَعْلَمْ أَنَّ اللَّهَ عَلَىٰ

كُلِّ شَيْءٍ قَدِيرٌ

[ مشرکین و یا خود یهود : باق محمد [صلی الله علیه وسلم] ، یاران و اصحابنه برشی ایله امر  
ایدیور ، صکره اوشیدن نهی ایدوب خلافتی امر ایلدیور ؛ بوکون برشی سویله یور ، یارین  
اندن رجوع ایدیور ، بوقرآن شوالده محمد علیه الصلوة والسلامک کندی سویلدیکی  
سوزلردن بشقه برشی دکلدردیدیلر و بوسوزلریله نسخه طعن ایلدیلر . جناب منزل الفرقان  
سرنسخی بیان ایلدیور و بونک ضمننده انلرک مقالاتی ابطال ایدرک سویله بیوریور :  
[ بز هانکی آتی نسخ ایدر و یا منسی قیلارسق اندن خیرلیسنی و یا مثلی اتیان ایلر  
[ اقتضای حکمت و مصالحته مبنی هانکی آتک یا یالکز حکمنی یا خود یالکز تلاوتی یا خود  
هرایکسنی تبدیل و یا اسقاط ایدر و یا خود هانکی آتی صدوردن بتون بتون فراموش  
ایتدیور ایسه انلردن نفع و ثوابجه قوللر من حقنده بحسب الحال دها خیری برنوع دیکرینی  
و یا خود نفع و ثوابجه مثلی کتوریرز ] . بیلمدگی که الله هر شیئه قادردر [ هر شیئه قادر  
اولان الله منسوخک مثلی و یا اندن دها خیرلیسنی ده اتیانه قادردر . قدرة اللهک جمیع  
اشیایه شمولی بیلنلر جناب حقک بوکی خصوصاته قادر اولدیفنده قطعاً اشتباه ایتمز ] .

نسخ : فی الاصل لغتده ، نقل و تحویل معناسنده ، نسخ کتاب بومعناجه درکه  
برکتابک صورتی دیگر برره نقل ایتمک دیمکدر [ . ] بومعناجه نسخ مقامنده استنساخ  
استعمالی شایع و مأوفدر [ . ] نسخ ، رفع و ازاله معناسنده کلورکه برشی دیگر شیئی  
تعاقب ایدرک انی زائل قلمق دیمکدر : کونشک ظلی و شیک شبانی نسخ و ازاله سی کی — خ .



نهمان احکام عملیه به متعلق آیاتدن ایکی آیت یئنقی جمع متعدر اولوبده تاریخلری ده معلوم اولورسه  
آنحقی اوزمان نسخ و تبدیلیه قائل اولنورده ایکنجی آیت برنجی آتی ناسخدر دینور ، علماء دین بونده

متفقد لر وعقائد و فضائل و اخباره متداثر آیاتده نسخ و تبدیل جاری دکلدرد. نسخ آیت اوج قسمدر :  
 بریمی یالکز حکم آیت نسخ اولمقدرد که قرآن کریمده معروف اولان نسخ بودر و اصولیونک  
 « بر حکم شرعی بی اندن متأخر بر دایل شرعی ایله رفع ایلمکدره دیه تعریف ایلد کای نسخ ایله ده  
 احکامه متعلق نسخ مقصوددر . بوقسم نسخده آیت ناسخه ایله آیت منسوخه نک هرایکیسی  
 تلاوته ثابت اولوب لکن آیت منسوخه ایله عمل اولماز : نتهکیم زوجی وفات ایدن  
 زوجهنک عدتی « والذین یتوفون منکم و یذرون ازواجاً و صیاً لازواجهن متاعاً الی الحول  
 غیر اخراج » آیت کریمه سنه مبنی بر سنه ایکن بو حکم ، زوجه متأخر بولنان « یتربصن  
 بانفسهن اربعة اشهر وعشرا » آیت کریمه سیله نسخ ایدلدیکندن اولکی آیت الله عمل ایدلر .  
 بوقسم نسخ آیتک معناسی : بر آیتدن مستفاد اولان حکم ایله تعبد و تکلیفک اندن متأخر  
 آیتک نزولنده انتهایسی بیاندر . بر آیتک حکمی نسخ و رفع ایدلدکدن صکره تلاوتک حسن  
 بقاسی ، او آیت قرائت اولنهرق ثوابک حصولی بقی اولسون ایچوندرد ؛ چونکه قرآن  
 کریم ، حکمیله عمل سهل و آسان اولق اوزره حفظ حکمی ایچون تلاوت اولندینی کبی  
 کلام الله اولدینی ایچون دخی تلاوت ایدیلورده ثوابه نائل اولنور . برده اول اسلامده  
 مصلحته و حال مسلمینه موافق بر حکم هر زمان و مکانده « مصلحته موافق دیگر بر حکمه بزه  
 نسبتله تبدیل ایدلش اولدیفندن بر آیتک نسخندن صکره تلاوتک ابقاسنده بوتبدیل ایله برتبدیل  
 حکم نعمت الهیهسی تذکر اولنهرق تعبد ایدلش اولور . ایکنجی قسم نسخ ، آیتک  
 یالکز تلاوتی نسخ ایدلمکدر [ الشیخ و الشیخه اذازنیا فارجهوها نکالاً من الله والله  
 عزیز حکیم ] کبی . بوقسم نسخک معناسی : بر آیتک تلاوتی نسخ ایدلدکده انک قرائتیه  
 تعبد و تکلیفک انتهایسی بیاندر . اوچنجیسی ، حکم و تلاوتک هرایکیسی نسخ اولمقدرد :  
 [ لوکان لابن آدم وادیان من ذهب لابتی الیهما ثالثا و لو ان له ثالثا لابتی الیه رابعاً و لایعلم  
 جوف ابن آدم الا التراب یتوب الله عن من تاب ] کبی . بوقسم نسخک معناسی : بر آیتک  
 نسخده انک قرائتیه و اندن مستفاد اولان حکم ایله تعبد و تکلیفک انتهایسی بیاندر . حکم  
 و تلاوتک هرایکیسی برلکده نسخ اولمسی ، اول آیت هم مصحفدن وهم صدوردن کلیاً  
 رفع و ازاله ایدیلرک نسباً منسیا فراموش ایتد برلسیله ده اولور ؛ نتهکیم روایت اولمقدرد که  
 صحابه کرامدن رجاعت برسوره اوقومق ایستدیلر ، حالبوکه « بسم الله الرحمن الرحیم » دن

بشقه اوسورده دن هيج برآيت خاطر لرينه گلدی . حضور سيدالانامه کيدب عرض کيفيت ايتاريله « تلك سورة رفعت تلاوتها واحكامها » بيورلدی — ق ، ش .

بوحالت فراموش ديگر لرنده واقع اولديني کي رسول اکرم صلى الله عليه وسلم افندمزده دخي وقوع بولديمی بولديمی بوخصوصده اختلاف ايديله رک بعضيلری « سقرئك فلا تنسى الامامشاء الله » قول شريفی ايله احتجاج ايديله رک وقوعه ، برطاقی ده « ولو شئنا لنذهبن بالذي اوحينا اليك » نظم جلیلی ، جناب حنك رسول اکرم افندمزده وحی بيورديني خصوصاتی اذهاب وازاله ايلکمه مشيت الهيمسي تعلق ايلديکمه دلالت ايتمسنه مبنی بو نظم شريف ايله استدلال ايدرك عدم وقوعه ذهاب اولديلر . فرقه ثانيه نك استدلالی ضعيفدر ؛ چونکه جناب حنك اذهاب وازاله سنی مراد بيورمديني خصوصات ، وحيك رسول اکرم دن اذهاب وازاله سی جائز اوليان نواعرينه حمل اولنه بيلور — م .

نسخ احکام بزه نسبتله رفع وتبديل ايسده شارح تعالى وتقدس حضرتلری برحکم منسوخی ابتدا مشروع قلدقمه انی بروقت معينه قدر مشروع قلمش اولديغدن علم اللهده نسخ ، حکم سابقك انتهای مدتی بيانندن بشقه برشی ديمك اولمديني جهته نسخده [ بداء ] بولمقامقله برابر اسباب معاش کي مصالح عباد دخي اوقاته کوره تغير ايدوب برزمان نافع اولان اغذيه ، البسه ، ادويه ديگر برزمانده مضر اولديني مثلاً برزمان نفی اولان حکمك آخر برزمانده مضرتی اوله جفته وبناء عليه نسخ جائز اولسه حکمت ايله احکام ارمسنده انتظام وتناسبك مختل اوله جنی بيدار بولنديغنه نظرأ نسخده حکمت ومصلحت واردر . شوخالده يهودك نسخده [ بداء ] واردر ، بداء ايسه عواقب اموزه واقف اوليان کسانده ظهوره کلديکندن جناب علام الفيو به اسنادی صحيح دکلدرديه نسخك جوازینی انکار ايتلری برزعم فاسد اولوب بوزعملری نسخ ايله بداء ارمسنده کي فرق واضعی کورمهاملرندن نشأت ايلش وبوسبب ايله موافق حکمت ومصلحت اولان نسخ احکامه تعريض ايتشاردر — ق ، ش ، س . بداء : برشيئت نفی خفي اولدقدن صکره ظاهر اولمغله اوئی حقده تجدد ايدن رأيدر .

بروجه محرر نسخ حکم ، حکم منسوخلك انتهای مدتی بيانندن عبارت اولوب تجدد رأيي تضمن ايلدکدن بشقه احيا واماتده اولديني کي نسخده دخي حکمت بالغه بولنديغندن عقلاً جائز اولديني کي نقلاً دخي جائزدر . ايشته اخوات وجزء ايله

استمتاع آدم عليه السلام زماننده حلال ايکن صکره لری سائر شرائعه نسخ اولمشدر .  
 ختان ابراهيم عليه السلام شریعتنده جائز ايکن صکره موسی عليه السلام شریعتنده  
 واجب اولمشدر . ايکی اختک بينی جمع یعقوب عليه السلام شریعتنده جائز ايکن صکره لری  
 سائر شرائعه حرام قلنمشدر - مرآت الاصول للمولی خسرو . باقک جناب خلاق  
 حکیم بر قطره نطفه دن بدیع الشکل بر ذیروح خلاق ایدیور ، برمدت حیاته ابقا  
 ایلدکن صکره انی امانه ايله ابعاض واجزاسنی طاغیور . خلق وایجادده تحولات دمدام  
 جریان ایلدیکی کبی احکام الهیدهده اقتضای حکمت ومصالحته مبنی نسخ جاری اولمشدر .  
 بونده فقیصه دکل ، کمال وار . زمانک ، مکانک ، احوالک اختلافی حسیله برحکمه شدت  
 احتیاج اولدیقندن طولانی بر وقت تشریح اولنورده دیگر بر وقت احتیاج زائل اولنجه او حکم  
 نسخ ایلدیله رک وقت آخره موافق دیگر بر حکمه تبدیل ایلدیلور . بو معنی بر حکمتدر؛ شو حالده او  
 حکم اولکنندن یاخیر وافع ویاخود مصالح عمومیه نک کندیسيله قیامی اعتباریله نفع وفائده جه  
 حکم اوله مائل اولور .

نسخ آیت تامة نک مادونندهده جاری ایکن آیت تامة نک تخصیص بالذکر بیورلمی  
 نسخ اکثریت ايله آیت تامةده وقوع بولدینی ایچوند - س .

اشنای تفسیرده کوسه تریدیکی اوزره آیت کریمه نک معناسی : هر هانکی آیت نسخ  
 اولنورسه عباد حقنده اقتضای حاله کوره مصالح و مشواتجه دها شیرلیمی ویا مثلی اتیان  
 قلنور دیمک اولوب دها خیرلی اولان شی ایسه حکم منسوخ بدلنده دها خیرلی و نافع  
 دیگر بر حکم اوله بیله جکی کبی حکم منسوخک بلا بدل مجرد ارتقاعی دخی بعضاً دها خیرلی  
 اوله بیله جکنه واحکام منسوخه یرینه کتوریلن حکملرک مکلفین حقنده خیر واصلح  
 اولمی یکی حکملرک مطلقا اولکیلرندن اخف اولمسنی ایجاب ایتمیوب دها دشوارلریده  
 بولنه بیله جکنه واحادیث نبویه « وما یطق عن الهوی ان هو الا وحی یوحی » نظم جلیلی ايله  
 ثابت اولدینی اوزره وحی الهی اولوب کرچه قرآن کریم الفاظ معجزه سی اعتباریله  
 احادیث نبویه دن خیر وارجح ایسهده احادیث شریفه نک عباد ایچون حاصل اوله جق  
 مصالح و مشوات اعتباریله قرآنندن خیر وارجح اوله بیلیمسی ویا مثلی اولمی تحت جوازده  
 بولمسنه مبنی نسخ بعضاً تبدیل و بعضاً مجرد رفع ايله اولور ، اتیان اولنان شی ایسه  
 مصالحته کوره منسوخدن کاهی اخف وکاهی اشد اولور ، ناسخ دخی یا کتاب ویا سنت  
 اولور . شو حالده بعثیلرینک : بو آیت کریمه منسوخک مطلقا بدلی اتیان اولنه جقنده

و او بىدلك ايسه منسوخدن اخف اولمى ايجاب ايلديكى كې اتيان اولنان شيدت منسوخ جنسندن اولمى ده لازم كله چككندە صريح اولديغى درميان ايدرك بلا بدل و يا خود بدل اقل ايله نسخ جائز اولمىدىنى كې سنت كتاب جنسندن اولمىدىنى جهته سنت ايله ده نسخ كتابه جواز بولمىدىغنه احتجاجلارى ضعيفدر .

طائفة معتزله : بو آيت كريمه ايله قرآنك حدوثه احتجاج ايدرك بعضى ناسخ و بعضى منسوخ و بعضى بعضى آخردن خير و انفع اولق صورتيله قرآنده تغير و تفاوت بولمىسنه نظراً محل حوادث اولمغه حادثدر ديديلرسده درميان اولنان تغير و تفاوت ذات قديم ايله قائم معنايه تعلق ايدن الفاظ و عباراتك عوارضندن اولوب الفاظ و عباراتك حدوثى ايسه تعلق ايلديكى معنائك قدمنه منافی اولمىدىغندن بو طائفةكده احتجاجلارى ناجاددر - ق ، ش .

« الم تعلم » قول كريمده همزه « اليس الله بكاف عبده » ايله « الم نشرح لك صدرك » آيتلارنده اولديغى كې تقرير ايجوندر . بوراده ابتدا خاطره شويله برشى كالور : آيت كريمه نسخ حقتدهكى طعننى رد ايجون سوق ايدلمش اولديغى جهته خاتمه آيتده ذكر قدرت مناسب اوليوب مناسب اولانى ، ذكر علم و حكمت ايدرك [ الم تعلم ان الله عليم حكيم ] ديتلملى ايدى؛ فقط تعميق فكر ايديلنجه بو خاطرهك قطعاسزاي اهميت اولمىدىنى اكلاشيلور، چونكه آيت كريمهك مسوق لهي واقعا بو ايسهده اسلوب نظمى، منسوخدن دها خير و نافعى و يا مثلى اتيان ايلديكى ناطق بولمىدىغنه و طعن واقع شايسته التفات اوليوب بالعكس عبادك بو صورتله تدوير مصالحى بر قدرت فائده دالات ايلديكى ايا ايتمىسنه مبنى بيان مذكوره ذكر قدرتك ترديف ايدلمى قدر مقامه مناسب هيچ برشى اولماز . آيت كريمه نسخ حقتدهكى طعننى رد ايجون سوق ايدلمشيكن بو رد تصريح ايديلور، نسخك سر و حكمتى متضمن بر بيان بليغ اره سنده اوبر شراره كې شعله افشان اولبور ، بو منطق و مرموزلر بر قاج كله ايله اذهان عرفانه القا اولنيور . كتاب اللهك تفرد ايلديكى بوكې اساليب اعجازكارانه قرآنده بك چوقدر ، بونكه چون آيات فرقانيهدهكى طرز دقيق بيان نظر اعماله تماشا ايدلك ايستر .

۱۰۷ - اَلَمْ تَعْلَمْ اَنَّ اللّٰهَ لَهُ مُلْكُ السَّمٰوٰتِ وَالْاَرْضِ وَمَالِكُمْ مِّنْ دُوْنِ اللّٰهِ

مِنْ وَّلِيٍّ وَلَا نَصِيرٍ

[ جناب رب عزتک بروجه مشروح خیر وانفعنی ویاخود نفع وفائده جه مماثلی اتیان ایتمک اوزره نسخ آیاته قدرت علیه سی شامل اولدیفنه استدلال اولنه رق شویله بیوریلیور: ] بیلمدگی که سبوات وارضک ملک [ وسلطنت ] ی الیهکدر [ بناء علیه بوملک عظیمه یکانه مالک بولنان ذات الوهیتک احکامدن برحکمی بیان اولندینی وجه ایله نسخ ایلمکدن عاجز اولمیه جنی آزاده ارتیابدر ] و [ بیلمدگی که ] سزک الیهدن بشقه هیچ برولی وانصیرکز یوقدر [ سزک مولی وناصرکز آنجق الیهدر . منکرلرک سز . برمضرت ایرات ایتماری ویاخود سزی نفعلندیرماری داخل استطاعتلاری اولمدینی جهته نه کندیلرینک نه انکارلرینک برقیمتی اولدیفنه مبنی انلرک نسخی انکار ایلمرینه ویاخود بونکه سزی تعیب ایتمرینه مبالاة ایلیک . انلرک انکارینه قایلک سزک رویت ومکانتکزه لائق دکلدر . سز احکام الیهده کی حکم عالییهی وجناب حقلک بوا کوان اوزرنده کی قدرت جلیله سی تفکر ایلمرک متانت کوسترک . سزک قهر وتدمیریکزه اراده ذوالجلال تعلق ایدرسه بونی سزدن او منکرلر دفع ایده مزلر ، سز بونی دوشونک ] .

« الم تعلم ، قول شریفنده کی خطاب رسول اکرم صلی الله علیه وسلم افندمزه ایسه ده « ومالکم من دون الله من ولی ولا نصیر ، جمله قدسیه سنده افراددن جمعه التفات بیورلمش اولمی دلالتیله مراد ذات رسالتناهلریله امتی در ومفرد صیغه سیله خطاب ایدلمی ذات نبوتناهلیری اعلم امت ومبدأ علم امت اولدینی ایچوندر . بو آیت کریمه آیت سابقه ده کی « ان الله علی کل شیء قدير » قول شریفک وجواز نسخک دلیل وشاهدی مقامنده اولدیفندن حرف عاطف ترک اولنمشدر — ق .

« الم تعلم » ده کی خطاب نبی محترم صلی الله علیه وسلم افندمزه ایسه ده مراد ، یهود وسائردهن اوله رق نسخه معترض بولنانلرک سوزلرندن درونارنده بلکه بر ایلمشیک حاصل اولان کساندر . اخذ وتلقی ایلمیکی شیک تعیب ایدلمی ضعیف الایمان اولان کیمسه نک دروننده بر اثر برافه جنی جهته او کیمسه نک القا اولنان شبهه [ دلیل باطله ] میلندن ویاخود اوشبهه درتدد قاله جفندن قورقیلور . بناء علیه نظم شریفده بوکی ضعفا تثبیت

وایمانلری قویه ایدیلیور . کلام عرب ایله مولدین کلامنده بر سوزی ، دیکری مراد اولندینی حالده بر کیمسه یه توجیه ایلك شائعدر . بونکچون بعض علما قرآن « ایاک اعنی واسمعی یا جاره » = قیزم سکا سویله یورم ، کلینم سن دکله ، اسلوبی اوزره نزول ایلشدر دیدی — ع .

۱۰۸ — اَمْ تَرْيدُونَ اَنْ تَسْتَلُوْا رَسُوْلَكُمْ كَمَا سَلَّيْتُ مُوسٰى مِنْ قَبْلُ وَمَنْ يَّبْتَغِلِ الْكَفْرَ بِالْاِيْمَانِ فَقَدْ ضَلَّ سَوَاءَ السَّبِيلِ

اولجه موصادن طلب اولندینی کبی سزده [ ای مسلمین بونجه دلائل قاطعه وشواهد ساطعه وار ایکن پیغمبر کزدن ] صحت نبوته دائر بشقه درلو دلائل وشواهد [ طلب ایتمکی هیچ آرزو ایدرمی سکز ] وقتله موسایی مجرد ازعاج ایچون قومی کندیسندن برطاقم اولور اولماز شیرلی ایستدکلری کبی سزده او وادی نمرد وتعتنه صبا برق پیغمبر کزدن بو قبیل شیرلی ایستمکی البته مراد ایله مزسکز [ هر کیم ایمانی کفر ایله دکشدیرسه ] ایمانه بدل نفی ایچون کفری اختیار ایدرسه [ محقق او کیمسه ره راستی شائرمشدر ] دلائل موجودیه احاله نکاه دقت ایده جک یرده بالعکس بونلرده شک وتردد ایله بلا تأمل وبلا رویت دیگر مطالبده بولمق نهایت ایمانی کفر ایله مبادلهیه مؤدی اوله جفتدن بو آرزوده اولان کیمسه شهسز استقامت طریقدن انحراف ایلش دیمکدر ؛ سز البته بویه بر ره نارفتهیه کتمزسکز ] .

« ام تریدون » قول شریفنده [ ام ] منقطعه در ومقصود مسلماندن بویه بر آرزونک وقوعی انکار واستبعاددر .

برکت زاده اسماعیل حق

